

Comunidad di Aruba conmovi cu e fayecimento di Hildward



ORANJESTAD – Comunidad musical y comunidad en general ta tristo cu e fayecimento di su gran musico, Hildward Croes. Recientemente, Hildward a biaha pa Colombia en busca di su salud, mientras comunidad a uni pa asina tin un “Chant for hope” pa recauda fondo pa su tratamiento. Sinembargo, ayera comunidad di Aruba a ricibi e noticia cu Hildward a bay sosega. **Les a detayenan riba pagina A4 & A10**

BON DIA Aruba

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #1330772

Hefe di Redaccion

Sharina Henriquez

Redactor Ehecutivo

Dionne Fradl-Jie Sam Foek
Zulaica Maduro

Redaccion

Benjamin Romero
Nathalie Winterdaal (Deporte)
Yakari Gabriel
Nadien Philip
Margarita Els

Coreccion

Jaime A. Mata

Colaboracion

Ariën Rasmijn
Oscar Vidal
Masnoticia
NoticiaCla
Associated Press
New York Times
Ret Karibense

Fotografo

Maritza Tromp- Lacle

Ehecutivo di Benta

Brigitte Wauben (Hefe)
Marijke Croes-Luidens
Mark Gomes

Diseño Grafico

Editorial



One Hildward Island

E noticia cu Hildward Croes a fayece, a capta nos tur.
Nos tur. Tristesa ta trece hende hunto.

Ora di lesa e mensahenan di condolencia y di unda nan ta bin, por conclui tambe cu no ta e tristesa so. Hildward mes tabata un persona cu a logra di unifica nos comunidad. Cu su musica, (y musica en general tin e poder di unifica) pero tambe cu su personalidad. E tabatin su opinion y a para pa esaki, pero den un manera cu no tabata dividi hende. Cu su talento, pero tambe cu su positivismo enorme y, traha duro. E tabata traha masha duro mes y su herencia artistico extenso ta e prueba di esaki.

“Musica ta (...) e idioma di nos alma”, sr. Croes a bisa den un di su ultimo entrestanan den e revista Xclusivo. Den e mesun entrevista e tambe ta expresa su soño: “ (...) algun dia, tur mi colega musiconan por realmente pone tur diferencia personal un banda, lubida nan ego pa un seconde y bini hunto den un union berdadero pa asina sostene (...) pa

hunto logra metanan mucho mas grandi cu locual nos ta comodo cu ne pa hopi aña caba.”

El a logra di lanta e fundacion Musica, trece union den e gruponan cu a fortifica e musiconan y mehora nan posicion pa cu Carnaval. Hasta na final el a ‘logra’ ora musiconan a pone nan diferencia, ego un banda, pa recauda fondo. Pues ayera Aruba no a perde solamente un gran musico, e ‘Principe’, prins di musica. Aruba tambe a perde un ehempel, un lider. Aunke hopi biaha sr. Croes tabata para patras (toca y canta patras tambe) den un grupo. Sinembargo e tabata un lider cu a logra cambio, uzando musica y sonrisa como arma.

Ora di evalua un lider riba su capacidad, ora nos evalua musica y sonrisa, tin un elemento cu ta importante pa nos saca nos conclusion. E elemento honestidad. Un lider cu ta mas ocupa cu su ego; mu-

sica traha pa gana cash lihe; un sonrisa falso, no ta convence hopi hende. Y siguramente no ta haci cu hende ta move pa cambio y traha hunto pa logra esaki.

Tin area cu mester di mas honestidad. Tin lider cu mester mas di esaki y mester baha e publicacion di e cantidad di potret di sonrisa falso. Otro aña nos como comunidad tin basta reto pa nos dilanti. Y den e ultimo añanan e marca di Aruba, ‘One Happy Island’, por sinti un tiki bashi, hipocrita, falso, sin alma. ‘One Hildward Island’ ta duna mas contenido, un contenido real di positivismo, forza y honestidad, un ehempel realistico. Pero manera e musico tambe a expresa, tin mas hende cu por duna e ehempel, si nos kier, henter e comunidad y bira e ‘One Island’. No tur ora nos ta logra pa ta ‘happy’ toch, pero a lo menos nos ta den union den periodo di reto, crisis of tristesa. □

Hildward Croes a fayece

Comunidad musical tristo cu perdida di un grandi



ORANJESTAD – Comunidad musical, pero tambe comunidad en general ta tristo cu e fayecimento di Hildward Croes. Ora e noticia a yega na horea di hende, medionan so-

cial a yena cu statusnan y potretnan cu tabata honra sr. Croes y su contribucion na musica.

Sr. Croes describi como un musico, compositor y arreglista. Recientemente a biaha

pa Colombia en busca di su salud. Sr. Croes tabata sufrir di cancer na prostaat. Algun siman pasa comunidad a uni hunto cu diferente musico pa asina tin un “Chant for hope” pa asina lanta fondo pa e tratamento di sr. Croes.



Den un entrevista cu e revista Exclusivo Aruba, sr. Croes a bisa cu e no tabata tin miedo pasobra Dios ta den su curason. Sr. Croes a remarca cu desde chikito su mayornan a tene fe presente den nan bida y den enfermedad su fe a keda intacto. Sr. Croes a describi musica manera e lenguahe y idioma di un alma.

Bida artistico

Sr. Croes a wordo nomina 3 biaha pa un Grammy y el a tour mundo cu hopi artista manera entre otro Chichi Peralta, Juan Luis Guerra, Wilfrido Vargas y tambe su propio banda Dushi Band. Sr. Croes tabata skirbi y dirigi Dushi Band cu a bira un di e bandanan mas popular riba e isla, specialmente durante tempo di Carnaval. Tambe sr. Croes tabata toca acordeon cu Grupo Di Betico cual ta un grupo di folklor.

Comentario riba medionan social

Hopi otro musico a tuma e medionan social pa expresa nan dolor cu e perdida di

sr. Croes kende nan ta yama “principe”, “maestro” entre otro. Antoni Gario di e banda LeGroove a comenta cu Aruba a perde un di su genio musical nan di mas grandi. Erin Croes, locutora na Magic Fm, a papia di sr. Croes bisando cu sr. Croes semper a sa di trece dilanti e miho inspiracion musical.

Aparte di ta e persona cu a nombra e emisora “Magic” tambe a tabata cla duna nan un man.

Otro musico mas cu tabata sinti e gran perdida ta Ed-jean Semeleer cu ta bisa cu sr. Croes tabata y ainda tin un papel di protagonista den su carera musical. Segun Semeleer, semper sr. Croes a pushe pa e sigui bay dilanti. Erik Eman, cu tabata traha cu sr. Croes ta conta Bon Dia Aruba cu sr. Croes tabata stima musica asina hopi, e no tabata importa p’e si un hende por a toca of no.

Basta e persona tabata tin mesun pasion. E tabata tuma tur e tempo necesario pa sinja un hende con pa toca sin bira rabia. Esaki segun sr. Eman tabata un gran regalo. □